

Minister Presidente Eman

"UNIDAD TABATA E BASE DI E LUCHA



Premier mr. Henny Eman

ORANJESTAD(AAN) -- Ayera Promer Ministro Eman a expresa su mes pa cu e celebracion di 18 di Maart y e reconocimiento cu ta duna na tur esnan cu a lucha pa Aruba su Status Aparte.

" Pa duna suficiente honor y respet na esnan cu den añanan 1947, 1948 a lanta para pa sostene e lucha pa Aruba para ariba su mes un pia, nos mester wak e den e tempo ey. E tempo cu no tabata tin, e circunstancia di e tempo ey. E tempo ey no tabata tin radio, no tabata tin television, no tabata tin corantnan diaria-mente den miles di cas. Tabata tin partinan di Aruba cu no tabata tin lus. Bao di e circunstancianan aki, 42 reunion a worde teni rond di Aruba, caminda e hombernan Arubiano a bini pa duna sosten activo na un lucha. " Esaki ta pa ilustra e condicionnan bao cua e lucha di Aruba a cuminsa cu ta circunstancianan totalmente diferente cu nos conoce awe. Y si no wak e lucha den e contexto aki ta perde e grandesa di e inicio di e lucha y e curashi y determinacion di e hendenan e tempo ey caba.

REUNIONNAN OFICIAL

"E reunionnan no tabata djies pa lanta man y dal un grito. Nan tabata reunionnan ceremonial caminda tabat tin presente notario cu tabata formula e opinion

exacto di kiko e persona lo bai firma. 42 documentonan a worde firma door di e hombernan Arubiano rond di Aruba, cu tabata casi henter e poblacion di homber na Aruba. Insuficientemente nos por enfatisa kiko esaki ta significa poní den e circunstancianan di e tempo ey, pa uni un Pueblo y duna forza na un sentimiento cu tabata biba rond di Aruba. Anto e ora presenta esaki na Reino Hulandes y exige pa Aruba bira un pais ariba su mes den Reino. Y ta e sentimiento comun fuerte aki cu tabata biba den nos grandinan cu a pone cu e mocion di 18 di Maart cu a worde accepta na Conferencia di Mesa Rondo na 1948, a bira e fundamento pa nos structura estatal nobo." Cu esaki Promer Minister a musta ariba e forza grandi cu tabata biba den nos Pueblo ya na 1947, 1948 y cu a conduci na e mocion ariba e fecha cu awe nos ta conmemora como e dia nacional di Aruba.

LIDERNAN CU A SIGUI

Añanan despues tabata e grand lider Betico Croes cu a bolbe scohe e dia di 18 di Maart pa hacie e dia di Himno y Bandera, awe 20 aña pasá. "Pasobra Betico Croes cu a worde introduci den politica pa Shon A a compronde e importancia di e mocion y e fecha aki pa Aruba. Y tabata e grandesa di Betico Croes cu apesar di a bandona AVP a sigui duna respet y honor na e lucha cu a cuminsa añanan promer y cu Shon A a guia. Tabata e determinacion di Betico Croes cu e a sigui cu e lucha te na final." Asina Minister Presidente a splica e grandesa di lideman grandi y cu discucion ariba esaki ta contrario na loke nan tabata kier pa Aruba.